


**TEZAU LITURGIC**  
**16 FEBRUARIE**

**SLUJBA**  
**SF. CUVIOS**  
**VASILE**  
**GRIAZNOV**  
**DE LA**  
**PAVLOVO-POSAD**



**MOSCOVA, 2000**



# Месяца февруария в 16-й день Святаго праведнаго Василия Павлово-Посадскаго

## На велицей вечерни

На Господи, воззвах: стихиры, глас 4.

Подобен: Яко добля:

Приспе днесь память твоя,/ Василие праведне,/ и благодать Божия, явленная в тебе,/ вся верныя к прославлению собирает,/ еюже возмогл еси вся наветы диавольския попати/ и Царствие Небесное унаследовати./ Сего ради молим тя:/ грехов оставления у Господа нам испроси,/ чтущим святую память твою.

Благодатию Божию от тьмы греховныя/ к свету боговедения призванный,/ слезами покаяния душу твою очистил еси,/ святе Василие праведне,/ и, на высоту добродетелей возшед,/ селений райских достигл еси./ Темже молим тя:/ помози и нам страсти греховныя победити,/ чтущим святую память твою.

Чистым сердцем и душою/ Богу поработал еси,/ праведне Василие,/ и плод сторичный Христу принесл еси,/ благочестием же себе украсив,/ неисчерпаемый источник чудес явился еси./ Ныне, в незаходимей славе

пребывая,/ помози нам во благочестии  
утвердиться,/ чтущим святую память твою.

**Слава, глас 6:**

**Возвеселимся** днесь, вернии,/ в памяти  
святаго Василия/ и, богоугодному житию того  
подражающе,/ отринем нечестие от сердец  
наших,/ стяжим милосердие и кротость,/ да не  
лишимся обещанных благих/ и вкупе с  
праведным прославим/ Единого в Троице  
славимаго Бога.

**И ныне, Богородичен: Кто Тебе не ублажит:**

**Вход. Прокимен дне.**

**И чтения преподобническая.**

**На литии стихира храма и святаго, глас 1.**

**Веселися,** земле Московская,/ возрастившая  
твердаго подвижника веры,/ Василия  
праведнаго,/ в малем времени жития земнаго/  
мног плод Христу принесшаго,/ ныне же в  
селениях Небесных со святыми пребывающаго/  
и молящагося о спасении душ наших.

**Слава, глас 8:**

**Явлением** святаго мученика Харалампия/ в  
проповедании истиннаго благочестия  
укрепився,/ праведне отче Василие,/ люди,  
ищущия спасения,/ в послушание Церкви  
привел еси/ и, о пользе душ их помышляя,/

христианскому житию научил еси./ Не остави и нас, угодниче Божий,/ совершающих святую память твою.

**И ныне, Богородичен: Безвестная Дево:**

**На стиховне стихиры, глас 2.**

**Подобен: ДOME Евфрафов:**

Скверну греховную слезами твоими,/ яко вторым крещением,/ омыл еси, святе Василие,/ темже и нам зрение грехов даруй/ и слезы покаяния у Господа испроси.

**Стих:** Блажен муж, бояйся Господа,/ в заповедех Его восхощет зело.

Премудростию Божиею просвещенный,/ утешение приходящим был еси,/ праведне Василие,/ сердца же наша светом Христовым просвети,/ да ты вси присно ублажаем.

**Стих:** Честна пред Господем/ смерть преподобных Его.

Мощи твоя, праведне Василие,/ благоухание Святаго Духа источают/ приходящим к тебе несумненным сердцем/ и страстей зловоние прогоняют,/ и здравие подают молящимся тебе.

**Слава, глас 6:**

Первее житие твое покаянием уяснивый,/ тьму греховную от души твоея отгнал еси,/ праведне отче Василие,/ и сын дне воистину явился еси./ Темже к Незаходимому Свету и нас

приведи, / благочестно ты почитающих.

**И ныне, Богородичен: Творец и Избавитель мой, Пречистая:**

**Тропарь, глас 4:**

**Божественною** свыше просветився  
благодатию / и образ жития евангельскаго  
показав, / правыя веры ревнитель / и расколов  
врачеватель явился еси, / праведне отче  
Василие. / Моли Человеколюбца Бога / даровати  
душам нашим велию милость.

**На утрени**

**По 1-м стихословии седален, глас 1:**

**Возвеселися** град твой положением мощей твоих, праведне Василие, / к ним же мы, усердно припадающе, молим тя: / буди нам предстатель пред Царем Небесным.

**Слава, и ныне, Богородичен:**

**Дев**о Богородице, Пречистая и Благословенная, и от родов избранная, / душу мою на стезю покаяния настави, / да воспою Тя, радуясь: / благословена Ты в женах, Всенепорочная Владычице.

**По 2-м стихословии седален, глас 2:**

**Явился** еси в земли Московстей, яко древо

благоплодное, праведне Василие,/ многотрудное житие проводя и в добродетелех усердно подвизаяся./ Мы же, подвиги твоя прославляюще, Христа величаем.

**Слава, и ныне, Богородичен:**

О, Мати Христа Бога,/ приими молитвы наша/ и умоли Сына Твоего в день Судный избавитися нам мучения/ и сподобитися Царствия Небеснаго.

**Величание:**

Величаем тя,/ святыи праведне Василие,/ и чтим святую память твою,/ ты бо молиши за нас/ Христа Бога нашего.

**Псалом избранный:**

Терпя потерпех Господа, и внят ми, и услыша молитву мою.

Постави на камени нозе мои и исправи стопы моя.

Предзрех Господа предо мною выну, яко одесную мене есть, да не подвижуся.

И утрудися во век и жив будет до конца.

Хранит Господь души преподобных Своих.

Восхвалятся преподобнии во славе и возрадуются на ложах своих.

**По полиелеи седален, глас 6:**

Апостолом святым подражая, праведне Василие,/ всего себе в служение Слову предал

еси/ и многия люди на путь спасения наставил еси.

**Слава, и ныне, Богородичен:**

**Кадильница** золотая Божественного Угля явилася еси, Мати Божия,/ спасение миру благоухающи./ Темже души наша от страстей очисти/ и добродетельми исполни.

**Таже степенна, 1-й антифон, 4-го гласа. Прокимен, глас 4:** Честна пред Господем/ смерть преподобных Его. **Стих:** Что воздам Господеви о всех, яже воздаде ми? **Евангелие от Матфея, зачало 43.**

**По 50-м псалме стихира, глас 6:**

**Свыше** просветився Божественною благодатию,/ разум совершен стяжал еси,/ **Василие** отче наш,/ темже, в мори житейстем преплавая,/ добрый кормчий верным явился еси/ и утопающим в бездне греховней/ надежду спасения подавал еси./ Ныне же, Небеснаго пристанища достиг,/ моли Человеколюбца Бога/ спастися душам нашим.

**Канон, глас 8.**

**Песнь 1**

**Ирмос:** *Воду* прошед, яко сушу,/ и египетскаго зла избежав,/ израильтянин вопияше:/ *Избавителю и Богу нашему* поим.

**Слове Божий, Иисусе Христе,/ отверзи ми ум**

и даждь ми слово,/ да воспою память угодника Твоего, праведнаго Василия.

От добраго корене прозябл еси, святе Василие,/ темже, благочестие родителей твоих унаследовав,/ издетска добронравное житие возлюбил еси.

Христос, Агнец Божий, вземляй грехи мира, доброту души твоя провидя,/ милостивно призре на тя, праведне Василие,/ и сугубую благодать подаде.

**Богородичен:** Образ чистаго Рождества Твоего, Пресвятая Дево,/ пророцы предначерташа многовидно,/ с нимиже Тя ублажаем.

### Песнь 3

**Ирмос:** *Небеснаго круга Верхотворче Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ Едине Человеколюбче.*

Видев злую смерть хулителя иконы Богоматере и внимая гласу Божию,/ устрашился еси грядущаго воздаяния, отче Василие,/ и к покаянию притекл еси.

Божественнаго гласа послушав,/ в Берлюковскую пустынь устремился еси, святе,/ и тамо, душу слезами очистив,/ на Господа все упование возложил еси.

На камени веры твердое основание

положив,/ храм души твоея добродетельми украсил еси, праведне Василие./ Темже в скорбех и напастех непоколебим пребыл еси.

**Богородичен:** Лествица, юже древле образно Иаков виде, явилася еси, Богоневесто,/ Тобою бо к нам Бог сниде/ и нам небовосходен путь сотвори.

### Седален, глас 3:

**Мытареву** покаянию подражая,/ страх Божий и смирение стяжал еси, праведне Василие,/ темже, и душу слезами очистив,/ плод обилен израстил еси/ и многия заблуждшия к вере истинней привел еси./ Моли Христа Бога спастися душам нашим.

### Слава, и ныне, Богородичен:

**Теплая Предстательнице** и непобедимая,/ Упование известное и непоколебимое,/ Стено и Покрове и Пристанище прибегающим к Тебе, Приснодево Чистая,/ Сына Твоего и Бога моли со ангелы,/ умирение дати миру, и спасение, и велию милость.

### Песнь 4

*Услышах, Господи,/ смотрения Твоего таинство,/ разумех дела Твоя/ и прославих Твое Божество.*

**Совет наставника твоего,/ еже в мире жити и**

Церковь от неправых учений защищати,/ со  
тщанием соблюл еси, святе Василие,/ и многия  
люди во истинней вере утвердил еси.

**З**акон Бога Живаго на скрижалех сердца  
твоего написал еси, праведне Василие,/ и, в  
заповедех Его усердно поработав,/ Небеснаго  
Иерусалима достигл еси.

**А**постольское слово, еже не любити мира, ни  
яже в мире сем, всегда памяствуя,/ противу  
похотей плоти и козней диавола крепце  
вооружился еси, святе,/ и воин Христов  
непобедим явился еси.

**Богородичен:** К Тебе, Госпоже Пречистая, с  
верою прибегаем и умильно вопием:/ радуйся,  
Благодатная Богородице Дево, Покрове и  
Ограждение,/ Помощнице и Спасение душ  
наших.

### Песнь 5

**Ирмос:** *Просвети нас повелении Твоими,  
Господи,/ и мышцею Твоею высокою/ Твой мир  
подаждь нам,/ Человеколюбче.*

**Ч**тением слова Божия и писаньми святых  
отец просветився, праведне Василие,/ во  
искушениях мужески подвизался еси/ и  
началозлобнаго врага посрамил еси.

**С**ветом Христовым осиян и благодатию  
Божиею просвещен, святе Василие,/ духовныма  
очима сокровенная зрел еси,/ ближняя от злых

обстояний ограждая.

Свет добродетельнаго жития твоего, отче Василие,/ единомудренную братию собра./ Тии же, подвигу твоему ревнующе,/ молитве и благочестию навыкоша.

**Богородичен:** Исцели, Чистая, душевныя наша страсти/ и телесныя немощи уврачуй,/ и спасение подаждь молитвами Твоими.

### Песнь 6

*Молитву пролию ко Господу/ и Тому возведу печали моя,/ яко зол душа моя исполнися,/ и живот мой аду приближися,/ и молюся, яко Иона:/ от тли, Боже, возведи мя.*

Злыя наветы, поношения и темничныя узы претерпел еси, святе,/ от лжебратии яко еретик оклеветаемь./ Обаче терпением и любовью вся превозмогл еси.

Ни пустынножителя, ни пастыря,/ но в мирстем чине делателя постави тя Премудрый Господь, блаженне Василие./ Ты же, добре потрудився,/ во ограду Церкви многия возвратил еси.

Взыскуя иноческаго жительства,/ суеты мира сего удалитися возжелал еси, святе Василие./ Обаче, волю Божию от святаго Харалампия уведев,/ со усердием людем послужил еси.

**Богородичен:** Иже мирови мир подавшая/ и

Начальника тишины рождшая,/ укроти волны  
страстей моих, Чистая,/ и на камени мя  
безстрастия утверди.

### Кондак, глас 2:

Соблазны лукаваго века сего отверг/ и  
слезами покаяния ризы твоя убелив,/ приял еси  
от Бога многая дарования:/ недужныя  
исцеляти/ и совет благоразумен требующим  
подавати./ Ныне же, радуясь со ангелы,/ моли  
Господа, Василие праведне,/ даровати нам  
покаяние и велию милость.

### Икос:

Ум и сердце имея Духом Святым  
просвещенныя,/ служил еси Богу и людям  
преподобием и правдою, отче Василие,/ и путем  
тесным шествовал еси, яко истинный ученик  
Христов./ Темже и Бог тя прослави/ и даром  
прозрения и исцеления обогати,/ мы же вопием  
ти:/ радуйся, угодниче Христов, Василие.

### Песнь 7

*От Иудеи дошедше отроцы/ в  
Вавилоне иногда/ верою Троическою пламень  
пещный попраша, поюще:/ отцев, Боже,  
благословен еси.*

Нищету Христову возлюбив, праведне

Василие,/ дом Духа Святаго явился еси,/ темже мудрый наставник людем,/ защитник обидимым и добрый помощник бедным показался еси.

Праведная жизнь твоя в вере и любви к Богу сродника твоего укрепи, святе Василие./ Ты же, мудрым советом того назидая,/ искати Царствия Небеснаго призывал еси.

Бегая суеты мира сего, праведне Василие,/ Христа всем сердцем взыскал еси./ Ныне же, во славе Ему предстоя, взываеши:/ благословен еси, Господи Боже, во веки.

**Богородичен:** Божественными сиянии ангельских воинств обступаема/ и с чинми пророк и апостол честно службу приемлющи,/ Мати Божия, посети нас, Твоих раб,/ молящи Христа Бога нашего даровати нам велию милость.

## Песнь 8

*Царя Небеснаго,/ Егоже поют вси ангельстии,/ хвалите и превозносите во вся веки.*

Аще и приял еси часть имения сродника твоего, святе Василие,/ обаче тленному богатству сердцем твоим не прилепился еси/ и сущим в нуждах щедрый податель был еси.

Подвигу преподобных отец ревнуя/ и слово

святителя Филарета исполняя,/ основание  
иноческому жительству положил еси, праведне  
Василие,/ и вкупе с единомысленными  
братьями богоугодне пожил еси.

Все упование на Бога возлагая, отче  
Василие,/ тяжкую болезнь со смирением терпел  
еси, благодарне взывая:/ Господи, Ты еси  
Прибежище от скорби, обдержавшая мя.

**Богородичен:** Немощным Крепость Ты  
воистинну, Пречистая Богомати,/ сего ради и  
мы, смиреннии, Тобою возвышаемся,/ всем Ты  
еси Покров и к Богу Ходатаица.

### Песнь 9

**Ирмос:** Воистинну Богородицу,/ Тя  
исповедуем,/ спасеннии Тобою, Дево Чистая,/ с  
безплотными лики Тя величающе.

Прежде отшествия твоего, отче Василие,/  
поучал еси братию любить слово Божие и  
молитву,/ хранить единомыслие и единокорие./  
Темже и нас в сих добродетелех укрепи, молим  
тя.

Память смертную стяжав, страха Божия  
исполнился еси,/ имже возмогл еси, святе  
Василие, мимо текущая сласти мира сего  
ниво чтоже вменити/ и козни вражия  
мужественне препобедити.

В житии от Христа не отлучался еси,

праведне Василие,/ в час кончины твоея во причастии Животворящих Таин с Ним соединился еси/ и ныне в Царствии Небеснем истее Пасхи нетленные наслаждаешься.

**Богородичен:** Помяни нас в молитвах Твоих, Госпоже Дево Богородице,/ да не погибнем за умножение грехов наших./ Покрый нас от всякаго зла и лютых напастей,/ на Тя бо уповаем.

### **Светилен:**

Яко светильник пресветлый, во мраце жития сего явился еси, праведне Василие,/ светом евангельским души заблудших просвещая/ и в ограду церковную приводя./ Моли Христа Бога, да чада Света явимся.

### **Слава, и ныне, Богородичен:**

Явилася еси, Богородице Дево, Вместилище Божественнаго Света,/ мглу души моея светом невещественным озари/ и вечнаго огня избави.

### **На хвалитех стихиры, глас 8.**

#### **Подобен: О, преславнаго чудесе:**

О, преславнаго чудесе!/ Подвижник веры и благочестия,/ сосуд избранный Божия благодати,/ Василий праведный явися,/ иже, духу мира сего не повинуюся,/ евангельския заповеди добре исполни/ и, горняя прилежно

взыскуя,/ Христу во славе ныне предстоит/ и молится о душах наших.

**О,** преславнаго чудесе!/ Духовными добротами украшенный,/ праведне Василие блаженне,/ яко славий\* dobroгласный,/ весну покаяния людем возвещал еси/ и заблудшия теплотою любви согревал еси./ Помози и нам, святче Божий,/ подвигом твоим усердно ревновати/ и Царствие Небесное наследити.

**О,** преславнаго чудесе!/ В земли Московстей/ новый крин благоуханный процвете,/ святой Василий праведный,/ иже духом горе устремися/ и Небесных обителей достиже./ Темже и Господь его прослави/ и мощи нетленные нам яви,/ во спасение душ наших.

**Слава, глас 6:**

**У**мертвил еси вся уды плотския на земли,/ о горнем мире неустанно помышляя,/ праведне Василие блаженне,/ жизнь твоя славна бысть/ и успение со святыми,/ сосуде избранный Божия благодати.

**И ныне, Богородичен, глас тойже:**  
**Богородице, Ты еси Лоза истинная:**

**На Литургии**

от канона песни 3-я и 6-я.

**Прокимен, глас 7: Возвеселится праведник о Господе/ и уповаеет на Него. Стих: Услыши,**

Боже, глас мой, вегда молитимися к Тебе. Апостол к Галатом, зачало 213. Аллилуиа, глас 6: Блажен муж, боайся Господа, в заповедех Его восхоцет зело. Стих: Сильно на земли будет семя его. Евангелие от Матфея, зачало 10. Причастен: В память вечную будет праведник:

